

■ **Berita dan Foto :**
 Hernie Sulliana Haji Othman

Kongsi kepakaran, pengalaman ICT dalam kalangan belia



KETUA Pegawai Eksekutif Imagine Sendirian Berhad, Dayang Suzannawati binti Haji Suharju semasa memberikan ucapan.

PEMANGKU Setiausaha Tetap (Pengajian Tinggi) Kementerian Pendidikan menyampaikan sijil kepada salah seorang peserta yang menamatkan Program Seeds for the Future 2022 anjuran Huawei Technologies di Negara Brunei Darussalam.

TUNGGU LINK, Selasa, 6 Disember. - Seramai 55 pelajar dari pelbagai institusi pengajian tinggi menerima sijil masing-masing setelah berjaya menamatkan program Huawei Technologies, Seeds for the Future secara maya dalam sebuah Majlis Penutup yang diadakan di Bangunan Tambahan Institut Sains Kesihatan Pengiran Anak Puteri Rashidah Sa'adatul Bokiah (PAPRSB IHS), Universiti Brunei Darussalam (UBD), di sini.

Program "Seeds for the Future" merupakan program Tanggungjawab Sosial Korporat (CSR) global utama Huawei Technologies yang mula dilancarkan pada tahun 2008, bertujuan untuk membangunkan bakat teknologi maklumat dan komunikasi (ICT) tempatan yang mahir dan merapatkan komunikasi antara negara dan budaya.

Dengan berkongsi kepakaran dan pengalaman ICT dalam persekitaran pemiagaan global, golongan muda dari negara yang berbeza boleh belajar tentang teknologi canggih dalam era transformasi digital masa kini.

Program yang dijalankan secara maya dengan kerjasama UBD tahun ini disertai oleh pelajar-pelajar UBD; Universiti Islam Sultan Sharif Ali (UNISSA); Universiti Teknologi Brunei (UTB); Institut Pendidikan Teknikal Brunei (IBTE), Politeknik Brunei; Kolej Antarabangsa Micronet; Kolej

Pemiagaan Laksamana dan Institut KEMUDA.

Para peserta telah menjalani program selama lapan hari di makmal komputer Bangunan Utama PAPRSB IHS UBD dari 17 hingga 24 Oktober 2022.

Hadir selaku tetamu kehormat bagi menyempurnakan penyampaian sijil ialah Pemangku Setiausaha Tetap (Pengajian Tinggi) Kementerian Pendidikan, Dr. Chin Wei Keh.

Turut hadir, Ketua Pegawai Eksekutif (CEO) Huawei Technologies di Negara Brunei Darussalam (NBD), Kevin Zhang Jianwei dan Ketua Pegawai Eksekutif Imagine Sdn. Bhd dan Ahli Majlis UBD, Dayang Suzannawati binti Haji Suharju.

Terdahulu, Kevin Zhang Jianwei dalam ucapan alu-aluannya menzahirkan penghargaan kepada UBD kerana menjadi tuan rumah bersama program secara maya Seeds for the Future 2022 tersebut selama lapan hari.

Beliau seterusnya mengucapkan tahniah kepada 55 pelajar yang

telah mengambil bahagian kerana berjaya menamatkan program intensif di mana mereka berpeluang bertukar pandangan tentang teknologi bersama pakar dalam bidang masing-masing, di samping mempelajari tentang teknologi berbeza yang ditawarkan oleh program tersebut serta bersaing dengan rakan dan pelajar dari negara lain untuk melancarkan projek yang dibangunkan.

Beliau juga mengongsikan bahawa salah satu pasukan Brunei iaitu Team Honor telah memenangi pusingan pertandingan Tech4Good dengan projek 'Our Langkah' dan menggalakkan pasukan tersebut meneruskan projek mereka dan menghidupkannya dengan menyertai Pertandingan Global Tech4Good yang akan diadakan tidak lama lagi.

Sementara itu, Dayang Suzannawati dalam ucapannya pula memuji program berkenaan yang dilihat sebagai pemangkin kepada belia Brunei untuk membangunkan kemahiran dan pengetahuan dalam sektor ICT, mempelajari teknologi terkini seperti Cloud Computing Huawei, Internet of Things; 5G dan Artificial Intelligence.

Beliau menggalakkan para peserta untuk mempunyai rasa dahaga untuk mempelajari perkara baharu, melangkah keluar dari zon selesa serta merebut peluang untuk mengembangkan lagi diri, kepimpinan dan kemahiran insaniah masing-masing.

"Pembelajaran hanya boleh dilakukan jika kita mendedahkan diri kita kepada persekitaran yang berbeza, budaya dan pengalaman yang berbeza.

"Inilah keindahan program Huawei's Seeds for the Future - Anak muda dari negara yang berbeza dapat berkongsi idea dan pemikiran yang akhirnya akan meluaskan pandangan kita," ujarnya.

Semasa program berlangsung, para peserta telah mengenal pasti kemahiran IT yang berkaitan, kekuatan, kelemahan dan jurang pembelajaran pelajar dalam persekitaran maya.

Visi transformasi digital yang diselaraskan dengan Pendidikan 4.0, akan meningkatkan pengalaman pembelajaran digital belia melalui pedagogi pembelajaran baharu dan inovatif yang melengkap teknologi pendidikan.

Selaras dengan visi tersebut, UBD telah melancarkan Ijazah Sarjana Muda baharu dalam Sains Digital pada 2021, yang memberi tumpuan kepada melengkapkan pelajar dengan pengetahuan dan kemahiran untuk berinovasi dan mencipta teknologi untuk menyelesaikan masalah dunia sebenar.

Program Seeds for the Future telah disampaikan melalui bengkel teknologi dan acara rangkaian di ibu pejabat Huawei di Shenzhen, China.

Seramai 30 pelajar Brunei tajaan Huawei telah mengambil bahagian secara langsung di Shenzhen dan Beijing antara tahun 2015 dan 2019, dan seramai 132 lagi telah mengambil bahagian secara maya antara tahun 2020 dan 2022.